

# Cuera survegn ina scoletta bilingua

Il parlament communal accepta la proposta da Luca Tenchio

■ (mc) **Cunter la voluntad dal cussegl da la citad da Cuira ha il parlament communal acceptà la proposta da Luca Tenchio (pcd) d'introducir già a partìr da l'onn da scola 2010/2011 scolettes bilinguas tudestg/rumantsch e tudestg/talian.**

La proposta en il messadi dal cussegl da la citad da sistir il project per motivs finanzials ed organisatorics è vegnida refusada da 12 cunter 9 vuschs. Radund la mesedad dals parlamentaris ha prendì il pled en la debatta che ha cuzzà bun duas uras, numerus aspectaturs han assistì a la sesida. La proposta da *Luca Tenchio* (pcd) è la finala vegnida sustegniada cunzunt da las fracciuns crixiandemocratica, socialdemocratica e dals verds, refusada è ella vegnida da la fracciun liberaldemocratica, da la Partida populara e dals burgais-democrats.

Critica hai dà per la pcd che fetschia cun questa proposta propaganda electoral e per la Lia Rumantscha che haja manchentà la sensibilitad cun la visada dal contract da scoletta cun la citad da Cuira.

Tenor la cussegliera da la citad *Doris Caviezel-Hidber* (ps) è la situaziun finanziala precara il motiv principal per la proposta dal cussegl da la citad da sistir il project da las scolinas bilinguas. Per il cussegl da scola sajan cunzunt era motivs organisatorics stads la raschun per sistir il project per il mument, per uschia pudair rimnar dapli experienzas cun la scola bilingua e cun l'introduciun da l'englais. Tenor *Christian Durisch* (pps) èsi nunchapibel che il cussegl discutescha ina tala dumonda suenter che il cussegl da sco-

la na sustegn betg il project. El è vegnì sustegnì da *Reto Lardelli* (pld) e da *Fritz Imholz* (pbd) che crititgeschan che la pcd veglia gudagnar chapital electoral cun questa debatta. *Fred Biebler* (pcd) e *Luca Tenchio* han refusà questa reprimanda, argumentond che la pcd haja sulettamain procurà per transparenza en chaussa.

Tant *Jon Pult* (ps) sco *Anita Mazzetta* (verda) han cumbatì la proposta dal cussegl da la citad, argumentond che las investiziuns en la giuventetgna sajan investiziuns per l'avegnir.

Tant Urs Cadruvi da la Lia Rumantscha sco *Ernst Bromeis* dal cussegl da scola da la scoletta rumantscha èn satisfatgs da la decisiun dal parlament communal da Cuira a favur da scolettes bilinguas.